

Delegat Krstan Simić postavio je dva pitanja.

Prvo pitanje, upućeno Vijeću ministara BiH i Ministarstvu pravde BiH, glasi:

„Sistemom krivičnopravnih propisa na nivou Bosne i Hercegovine predviđena je amnestija kao poseban vid blagodara države prema pravosnažno osuđenim licima. U članu 60. Zakona o izmjenama i dopunama Zakona o krivičnom postupku BiH pominje se institut amnestije. Ovaj institut postoji i u pravnom sistemu entiteta i u nekoliko navrata bio je i primijenjen. Međutim, na nivou Bosne i Hercegovine od osnivanja pravosuđa BiH ovaj institut nikada nije oživio, pa imajući u vidu da mnoge države u okruženju krajem godine ovim institutom utiču na resocijalizaciju ličnosti, pitam:

Da li resorno ministarstvo ima u planu, a ako nema zašto, da ovaj institut uvede u pravni sistem BiH na nivou države?“

Drugo pitanje, upućeno Vijeću ministara BiH i Ministarstvu pravde BiH, glasi:

„Na prostoru država nastalih raspadom Jugoslavije vrlo često se primjenjuje mjera pritvora kao sredstvo obezbjeđenja toka istražnog postupka. Odlukama sudova u ovakvim prilikama duboko se zadire u ljudska prava osumnjičenih jer se lišavaju slobode samo na osnovu sumnje da su počinili krivično djelo.

Praksa Evropskog suda u Strazburu je eksplicitna, ova mjera primjenjuje se samo u izuzetnim slučajevima. Pri tome moram dodati da ovakve mjere često i u javnosti i u medijima izazivaju oprečne stavove jer se od ovakvih predmeta prave „priče“ koje mogu uticati i na nezavisnost pravosuđa.

Međunarodne organizacije koje provode kontrolu rada pravosudnih institucija u ovim državama uključujući i Bosnu i Hercegovinu uporno ukazuju da sudovi olako posežu za ovom mjerom. Također, sve izneseno odnosi se i na Bosnu i Hercegovinu.

Imajući u vidu navedeno, tražim da mi se dostave podaci o tome koliko trajanje pritvora nije pokriveno kasnije pravosnažnim presudama, te koliki su iznosi naknade štete i troškova postupka isplaćeni ovim licima. Ukoliko ste u mogućnosti, ovi podaci bili bi mi korisni i za rad pravosudnih institucija oba entiteta.“